

www.BibleForChildren.org

Mateu 26



Ka auyewa
ai yau 6 imamaei,
e munia Itouvuha
Toneina ivi-putui. Ka
Iesu Eparaim ni-tawanei,
omoi Betani. Betani-nana
Lasarusi ya meagai, ka tauna
mamaei. Iuna Iesu avaha
tauna anigea si-vi-mini.



Ka tutana
iamam, Mari
daudau epei, e
daudauna manina
hunahuna
ahihi-vainena, ana wava
naridataV, ka deina $\frac{1}{2}$
litaV, ka daudauna patana
ani-vainena. E Mari omo
Iesu wayahina,
ka daudauna aena
ito-iwahi-yehai, e apanana
wayahina aena nau-wohi. Ka
daudauna manina ahiahina
manua nau-vi-anai.



Ka Iesu a tau hae anani ai yau 12 wayahia, aitam ana wava Iudasa me Kariota. Tauna omo tau vi-nomu mata-genai wayahia, vivane Iesu na-vauei wayahia. Ka tau, avaha ya vonana inononi, idewa-haiawa, ka ivona-dabadaba Iudasa wayahina kina ivenei. Ka tauna awaehei naunau-nene medeina kadi memeanina na-vauei.




Ka a tau vi-muni-waiwai ine, e ya
vonana ivi-ateteyei, e Itouvuha
Toneina an' am ivo-vi-aiaia. Ka
iamam, ka Iesu palaua aitam epei,
nau-kaiwa Yaubada wayahina,
pakeua, e a tau vi-muni-waiwai
venei. Ka vonei, "Un'-epei, un'-ania.
Taina ininiu."




Iakwa, e tauna aitam vei na
wainaV epei, nau-kaiwa Yaubada
wayahina, e venei. Ka ivona,
“Habuhabumi vei taina wayahina
una-nim. Taina dayahiu. Yauke
aito-iwahi, ka awaeha vovouna
avevewanei tomotau habuhabui
wayahi. E tau i yai goyona a nua-piahi
avi-maiei deina.”




Ka Iesu ivona Simoni wayahina, "Simoni, Simoni enononi. Satana avaha an' awaeha vaniahei Yaubada wayahina, e habuhabumi na-nau-dadanimi, e goyona nihenimia na-vaniahei, aitam tau baguna witiV utuna pouna ka utuna wagana na-tana-vewani deina. Ka Simoni, yauke avaha aviama wayahima, e yam vitumahana wayahiu eha evo-haini."



“Apaina ena-ihanua, ka kadu ena-peu. Ka munia, avi tuta wayahina emavina wayahiua, ka evi-muni-havineu, wamke nau-wawanim yam bagibagi vovouna vavaneim evo-patai.” Ka Pita ivona, “Kauvea, yam vonana eha tunuhina, iuna ataina tuta yau ate-vatu mamaei. Kadue aituhu ipoy' -avinim itainim manua yohona wayahina, akanai au pata itainiu manua yohona wayahina deinake, o kadi aituhu inau-vi-anigim, akanai yawaiu awaehem inau-vi-anigiui deinake.”



Ka Iesu vona-nau-patei, ivona, "Eha. Pita, avona ahiahina wayahima, ataina tuta a itoava mana-putua wayahina evi-ebueu tuta aitonu wayahia, ka ena-vona wayahiu, 'Eha onotona at'-anamane!' Ka munia kamkam onotona yana tou kanononi."



Ka Iesu tauna a tau
vi-muni-waiwai nui iomo
aitam baguna ana wava
Gedisemane wayahina,
ka vonei, ivona, "Itomi
ami yau 8 umanuena baina,
ka yauke ana-nei tenoke
aviama." E ivona, "AbaV (a
vo-vina 'Amau'), dewa
habuhabuna memeanina
wayahima. Ka aituhu ana
pata, dewa hidahida ana vei
taina wayahiua en'-epei. Kate
aituhu yam nuanua ana-nim,
akanai, yau nuanua deina."



Wayahina, Iudasa omoi bagunana, ka tauna yoko
ananina eta-naonaoi. Ka yokoia nihenia vivane
tau nau-havia yoko, ka tau mini-potapota tupwai
tau vi-nomu mata-genai wayahia, ka kadue
tupwai Parisi yai yoko wayahia. Ka
taui habuhabui Iudasa
ivi-munie iomomo
bagunana wayahina.



Ka tau iomomo yai lampaV wayahia, ka yai odama wayahia, ka kadue havia a gugua wayahia. Ka aitam wayahia eha ta-potapota Iesu ya vona-nau-pata wayahina, ka yana inama si-naia, ka tau vi-nomu ananina a tau paisewa aitam tanihana ateina tana-honoi. Ka Iesu ivona, "Ia! Ugenuana!" Ka Iesu onotona tanihana vo-dadani, e vo-vi-aiaia.




Wayahina, Iesu ipoy'-avini, ka itaini ineiei tau vi-nomu ananina ya manua wayahina. Ka Pita enoma vi-munie. Ka manua upuna wayahina tau Iesu ipoy'-avini inau-hohona ka avaha ai ipoui. Ka Pita omo ka nui imanuenta.



Ka tau vi-nomu ananina
ya tau paisewa aitam
mamaei. Ka Pita avaha aitam
tau paisewana yana yoko
wayahia tanihana upwa-yavunei.
Wayahina, tau paisewana mini,
ivona, "Mataua avaha wamke
tauna ami inua adueyemi Baguna
Olive nihenina, a?" Wayahina,
Pita tana-tavutavuna-havine.
Ka visi-kwayavoni kamkam onotona itou.





Wayahina, Pita nuana ivita
ananina, e iopu vuvunaha ka
tou vi-mohai, iuna ya
ini-yauyau ani-vainena.



Wayahina, tau nau-hohona-naia habuhabui imini, e Iesu itaini ineiei me Rom ai tau veimea ananina Ierusalem nihenina wayahina, ana wava Pilate. Ka yokoia yai nuanua vivane Pilate yai nuanua Iesu wayahina n'-awaehei. Wayahina, Pilate Iesu vi-tanaiei, ivona, "Kaiwadi, wamke me Iudea



yai kiniV, a?" Akaka Iesu vonei, ivona, "Ika, yam vonana deinake."



Ka Pilate nuanuana Iesu na-ito-yavuhi.
Wayahina, yokoia viama-havine
wayahina. Kate tau
ivi-hone-havihavine movi
bagibagina wayahina,
ivonavona,
"Ai nahanahana
wayahina etutu-pwatei!
Ai nahanahana wayahina
etutu-pwatei!"



Ka dewa pai nau-yehata wayahina
Pilate yokoia yai nuanua awaehei, e
Iesu a tutu-pwata veimeyei kadu
am-veneneyei, e ai nahenahea
itutu-pwatei. Ka tau nau-havia Iesu
itaini, iveimeyei. Akaka Iesu iopu, ine,
e tauna an' ai nahanahana avanei. Ka
tauna omo papani-nana ivi-wahani
"Ununu Kabwa." (Ka me Ebereu movia
ana wava Goligota.)



Ka tanoi ai nahenahea
itutu-pwatei, kadu onoto
ainua nui, papani aitam,
papanina aitam, ka Iesu
niwania.



Dewana vin'-omoi iuna babau eha ya maheta. Kadu Manua Vito-pota an' awa-pota mamananina nihenina am-yehi-nuei. Ka Iesu movina ananina wayahina vi-hone, ivona, "Amau, nuau nimama aboui." Ka ya vonana nau-yehai, e yawaina iakwa.



Akaka aitam onoto, ana wava
Iosepa, tauna me Arimatea,
omoi. Ka tauna me Iudea
yai tau nau-hohona ka yai
tau eta-naonao aitam,
ka ya vitumahana nui
potapota avi tuta
Yaubada ya pai
veimea tanopia
vi-putu.

Ka Iosepa yan'
ate-vatu nui omo
Pilate matana, ka ya
viana boui vivane
Pilate Iesu tau
matena awaehei
unuvovoa na-boui.



Ka Iosepa kaleko lineniV kavukavuna
vi-maiei omanei, e Iesu tau
matena ai nahenahea
opu-meiei, e kalekona
lineniV wayahina umei.
Iakwa, unuvovoa boui.
Ka unuvovona nonova
ihana-nibei hanu
nihenina, ka hanu
ani-vainena ka

yanayanana
vo-bwatabwata-vinei,
e unuvovona awana
ibou-potei deina.



Ka Iesu itutu-pwatei me Isiraeli yai
auyewa pai vo-vi-aiai wayahina.

Ka mana navia yai
auyewa tapanono
wayahina, tau vi-nomu
mata-genai, ka Parisi
yoko habuhabui
nui iomo Pilate
wayahina.



E ivona, "Bada, tau vitupu-nana,
nonova yawayawaina
mamaei, ka yana vona
anuani, ivona, 'Auyewa
aitonu iakwa, e anigea
amini-havine.'"



Akaka onoto-naia iomo unuvovo-nana
wayahina, ka hanu-nana awana
bou-potei hetana yai pai
ainana iaiwaiwahi,
vi-toyoa. Kadu tau
dune-vi-avina-naia
iveimeyei
idune-vi-avini
ahiahina.



Auyewa tapanono-nana iakwa, e mana
navia, wiki vovouna an' auyewa
naona wayahina, ka Mari me
Magidala wahana nui iomo
unuvova tau matena
inau-vi-tai. Ka yoyoyo
ani-vainena si-putu,
iuna Kauvea yan'
anelose aitam
wahuma

opu-me, e tauna
hanu-nana unuvovo
awana buge-mavinei,
ka hetana
manuena.



Ka unuvovo a tau dune-vi-avina-naia,
avaha anelose-nana idueyei,
akaka imatamatauta ananina
ya bagibagi wayahina, ka
itatatava, ipeu tanopia,
habuhabui tau mate
deina.



Ka anelose-nana vaivine-naia vonei,
ivona, "Eha umatamatauta. Avaha
anamanei uomo Iesu tauna
avaha inau-vi-anigi
unenenei. Kate tauna eha
baina. Iuna avaha
anigea mini-havine,
nonova mai-vonemi
deina. Un'-omoi,
ka ya pai

dauva awakabina
udueyei."




Wayahina, vaivine-naia yai matauta nui kadue yai dewa-haiawa nui unuvovo ini-tawanei, ka ivisi-kwayavoni imavine Iesu a tau vi-muni-waiwai wayahia imataedai. Ka etawana inau-bwanunua, ka Iesu vaniahai, e tauna vonei, "Mana-putu ahiahina." Ka tau iomo, e

ivi-tupa-gum,
ka aena

ivo-dadani,
ka iaiwaodu wayahina.





Ka munia, Iesu a tau hae anani ai yau 11 matataui imanuena ka iamam, e Iesu vin'-omo wayahia. Ka Iesu vona panina wayahina yapoi, iuna aituhu aviyaivia ya mini-havine avaha idueyei imataedai, mataeda habuhabui ivihahaiei. Ka kadu Iesu yapoi iuna tau nuai toyoina. Ka avaha Kauvea Iesu vonana ipupu-yehai, Yaubada tauna si-nai wahuma, ka tauna Yaubada ateina manuenta.



Iuna Yaubada tomotau habuhabui
tanopia dune-nuanuai ananina.
Wayahina, tauna Natu-hoina vi-tunei,
ka vi-nomuei wayahi, ka aituhu
aviyaivia tauna ivitumahanei,
taui eha in'-aniga-vavaha,
kate yawai-vavaha
ivaniahei.



Rom 3:23

Aitamoata aitamoata wayahikaia dewa goyona kadedewei.
Wayahina, aitamoata aitamoata wayahikaia kavi-kutakuta
Yaubada didigana wayahina.

Rom 6:23

Aituhu dewa goyona kapaisewei, aka nau-pata dewa
goyo-naia wayahina vivane aniga. Kate eha aka pata
kapaisewa Yaubada yan' am-venena wayahina. Eha. Tauna
yan' am-venena wayahikaia vivane awawaehina, kadu
am-vene-nana vivane yawai-vavaha yaka Tau Ito-yavuha
Iesu nihenina. Ka tauna vivane yaka Kauvea.

Ebereu 9:27

Itoka tomotau nau-wawanika kan'-aniga tuta
aitamoata wayahina. Na-iakwa, nau-wawanika
nau-yanahi kavaniahiahei.



Epesusi 2:8,9

Vona ahiahina, itomi ito-yavuha uvaniahei Yaubada yan' am-venena awawaehina ana heta wayahina. Ika, ito-yavuha kavaniahei yaka vitumahana wayahina, eha yaka paisewa wayahina. Ka vitumahana omo Yaubada wayahina, vivane yan' am-venena-kavovo wayahikaia.

Rom 10:9,10

Vona tunutunuhina, Iesu Tau Ito-yavuha aniga, kadu munia Yaubada anigea si-vi-mini-havinei. Ka aituhu aviyaivia vaneana ivitumahanei, kadu aituhu ivona, "Iesu vivane Kauvea-hoina a heta-ohota," akanai Kauvea na-ito-yavuhi. Ka dewa taina ainua nau-wawanika kadewei. Naona nau-wawanika nuaka nihenina Iesu Vaneana kavitumahanei. Aituhu kadewei deina, Yaubada awaeheka kavi-tau tunutunuhika. Ka kadu nau-wawanika awakaia kawaehei, kana-vona, "Iesu Tau Ito-yavuha Kauvea-hoina." Ka aituhu kadewei deina, Yaubada yaka vona na-nononi ka na-ito-yavuhika.



Ioni 3:16,17

Iuna Yaubada tomotau habuhabui tanopia dune-nuanuai ananina. Wayahina, tauna Natu-hoina vi-tunei, ka vi-nomuei wayahi, ka aituhu aviyaivia tauna ivitumahanei, tau eha in'-aniga-vavaha, kate yawai-vavaha ivaniahei. Yaubada tauna Natu-hoina tanopia vi-tunei, kate eha ya nuanua Natu-hoina tau ma' tanopi na-yapo yai goyona wayahi. Eha. Kate Yaubada ya nuanua Natu-hoina wayahina tau ma' tanopi na-ito-yavuhi.



1 Ioni 5:11-13

Ka ya hae-nana taina. Yaubada avaha yawai-vavaha veneka, ka yawai-vavaha tanoi kavaniahei Natu-hoina nihenina. Ka aituhu aviyaivia Yaubada Natu-hoina nihenina imamaei, tau avaha yawai-vavaha ivaniahei. Kate aituhu aviyaivia eha Yaubada Natu-hoina nihenina ita-mamae, tau eha yawai-vavaha ita-vaniahe. Ka taumi avaha Yaubada Natu-hoina ana wava uvitumahanei. Wayahina, yauke vonaia aginumi omomo wayahimia. Ka yau nuanua una-iavi, un'-anamane vivane avaha yawai-vavaha uvaniahei.



Mateu 26-28; Luke 22-24; Ioni 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Minaveha NT (mvn) © 2008, Wycliffe Bible
Translators, Inc. All rights reserved.

<https://www.bible.com/bible/1261/MAT.1>

©2025 Bible for Children, Inc.

www.M1914.org

www.bibleforchildren.org

